


1621\_219.jpg



*Histoire de nostre temps.*


219

rechercher les auteurs de ceste mort, & qu'il s'en trouueroit des preuues contre des grāds Seigneurs Catholiques, & où les Iesuites ne seroient pas oubliez, n'en ayant rien fait depuis neuf annees, tout le monde a iugé qu'ils n'ont parlé de ceste lamentable mort que pour pretexer leurs rebellions. On pourroit mieux surnommer ceux de vostre Religion, *Poltrots*, du nom de Poltrot le premier assassinateur de Princes qui ait esté depuis le commencement des troubles pour la Religion; car de nier, comme aucuns de vous autres font qu'il n'estoit point de vostre Religion pret.ref. & que les Grands & autres n'auoient trempé en cest assassinat; Consultez le plus fameux de vos Historiens le sieur d'Aubigné pag. 176. liur. 3. & vous recognoistrez le contraire par ces mots: *Les chefs à qui Poltrot communiquoit son desir & dessein de tuer le Guisard luy faisoient des remonstrances, qu'il ne se fallloit pas tromper aux vocations extraordinaires: Mais pour en parler avec franchise, veu l'esperance qu'on prenoit de luy auant le coup, (comme ie l'apprenois en bon lieu, quelque enfant que ie fusse) j'estime que les langages qu'on luy tenoit sentoient le raffin & donnoient le courage.* On vous pourroit donc bien appeller *Poltrots*, du nom de vostre premier assassinateur: Mais trāchons le court, tous noms & sobriquets de party qui peuvent apporter de la diuision & des animositez entre les subjects du Roy doiuent estre prohibez. Je n'approuue point qu'on vous appelle *Poltrots* & *Parpaillots*, non plus aussi que vous appellez les Catholiques *Rauaillacs* & *Papistes*.

Ce que dit d'Aubigné en son Histoire de Poltrot premier assassinateur de Princes depuis les troubles pour la Religion.

Tous noms ou sobriquets de party doiuent estre prohibez.

1621\_220.jpg



**Image issue du site [mercurefrancois.ehess.fr](http://mercurefrancois.ehess.fr) - Cliché (c) Cécile Soudan**